

KOLOSE BATII

Kukū Ko Di Paulo Lakpana Aata Ni Kolose Batii

¹ Kukū ko mmle lekye ami, Paulo nfū, diefe ni di Yaa dibiesaa kamε, ni ntəbakple Kristo Yesu təkyente ne. Ami ku obiloo Timoteo nikokpana kū. ² Munkyesee aye babiloo ba ninkpe ni di Kolose, di Yaa ntɔɔbla ni klekle, mimbla ni lesaa di osuku kanya, biebla ni onwii ku Kristo. Teete loo Yaa ale ye sibuale, aata ye atoko ɔkyε ole.

Paulo Lape Yaa Sεfa Di Kolose Batii Disi.

³ Obe lele mumpε Yaa wɔ ninle ni Saate loo Yesu Kristo Ote sεfa, nse buɔpε ɔlaa munta diisi lee. ⁴ Diekye butoonu mmle okle biefū Kristo Yesu bienu ni osie kanya, ku mmle okle mimbɔmbɔ ni Yaa bafūbanutε bamuu. ⁵ Obe wɔ baatɔkɔ ye ni nwaako ɔlaa nwu nkpo, ninle ni ɔlaa biene nwu lεkasale, bianu asaa biene ya ninle ye ni ale di osi. Obe wɔ bietika ni anu di nle mmle oso, ofū onu lee ku lεbɔmbɔ lee ntika di lesaa le suoto bietika ni anu. ⁶ Olaa biene nwu nkpo kokple kunwako dikusɛkussε, kuɔkpε kumbuo kaayi ka mmle, fe mmle okle kutɔɔbla ni kaamε lee, diεyɔ ni di dii le bianu ni Yaa sibuale nwu nkpo lεkasale, bitɔɔwa biebatofo nwu ni fe mmle okle kute nii. ⁷ Obiloo bɔmbɔtε Epafra wɔ ninle ni kpemblatε wo loo, oololaa Kristo ɔkpε ambla ni kaanya loo, namatuo ye asaa di Yaa

sibualε nwu nkpo suoto. ⁸ Nnwɔɔ niεmatɔkɔ wo lεbɔmbɔ le di Yaa Ninwuna ɛεta ye nii.

⁹ Nle mmle oso, dieyo ni di dii le buanu ye ni ɔlaa, obe lele buɔpε ɔlaa muta diisi lee. Buɔkaale Yaa bulε, ata ye bitofo dibiesaa nɔɔ ku ninumbe nɔɔ nimuu ku lesɔnū le di Ninwuna nɔɔ nta ni niimu kame. ¹⁰ Ni bibafuo nkpa osie fe mmle okle di Saate nwu nkpo komie nii, obe lele kafɔɔ bibabla lesaa le nikobuo nwɔ ni anu. Nkpa lee kamadiki ɔsaabla biene ate ate amuu antuo, minkple mintofo Yaa minkyakaa. ¹¹⁻¹² Yaa ayc osie nɔɔ kplε nwu nkpo amufū ye aklee osie kanya, ale biafuo otu okpee lesaa biala kame mintε suoto kaasɔ. Biyɔ suoto ɛεyɔɔ bipε Teete sεfa obe lele, diekye nnwɔɔ nieta ale buɔwε kalekɔ di lesaa le eelolaa ɛεte ɛεta ni batii nɔɔ di sekə kalekɔ nɔɔ lεkpa nwu kame. ¹³ Nnwɔɔ niediki wo eekyeko ditunu kame ninwuna nnεε kame, ni ɛεyɔ wo eekpee di Obi nɔɔ bɔmbɔtε sekə kalekɔ nwu nkpo kame ne. ¹⁴ Obi wɔ mmle nwu nkpo kame di Yaa lefe eediki wo ne, ni ɛεyɔ sikpile loo kafɔɔ ɛεkye wo ne.

Kristo Ninle Yaa Letembi Ku Asaa Ya Bεεbla Ni Amuu Saate.

¹⁵ Kristo niediki Yaa wɔ munɔɔnya ni kuanu letembi eetuo. Nnwɔɔ ninle Yaa Obi kasale wɔ nikole ni sekə di asaa amuu suoto ne. ¹⁶ Diekye nnwɔɔ suoto di Yaa lafe fie aabla asaa amuu. Asaa ya ninkpe ni di osi woo, n-ya ninkpe ni kaasɔ ka mmle suoto woo, asaa ya mananya ni kuanu woo, n-ya mananya ni kuanu woo, ninwuna kame basiente woo, baka woo, batunletε woo, ee basiente yi, Yaa Obi nwu nkpo suoto eefe

εεbla nya fεε ne, nnwɔɔ kafɔɔ εεbla nya εεta.
17 Kristo nfe nkpe fiε di Yaa labla asaa amuu. Diefe ni di suoto nɔɔ, ni laasaa amuu kafɔɔ nte ninfū dikaate ale eete ni ne. **18** Nnwɔɔ ninle disi εεta suoto nɔɔ sina nwu ninle ni bafūbanute dikudi nwu nkpo. Nnwɔɔ kame diikudi nwu nkpo nkpa lεtaa diekye. Nnwɔɔ ninle Yaa Obi kasale wɔ aatakatesa aakyeko ni kukpi kame, ale aale ni lεsaa biala katū. **19** Yaa omu dibiesaa diale ale letembi le nimu nimu ninkpe nwɔ ni kawε Obi nɔɔ nwu nkpo. **20** Diefe ni di Obi nɔɔ nwu nkpo suoto ni di Yaa lekple eetuna ale oolola nnwɔɔ ku asaa ya ninkpe ni di osi ku kasɔ kamuu ntεε ne. Yaa lεwako atoko ɔkyε ole wɔ mmle diefe ni di Obi nɔɔ ntɔ be aawii ni kaasɔ di kowoso suoto.

21 Saa yi, onwii ɔtambla lasie di aye ku Yaa ntεε, biakyidi nwɔ diisibu lee kame diekye di sikpile se biatɔɔbla ni oso. **22** Kafɔɔ nunua, diefe ni di Obi nɔɔ suoto sina kukpi nwu nkpo kame, atookple eefū wo ku nnεε nnyɔ, εεyɔ wo eese di anu nɔɔ fe batii ba ninte ni klekle, di okpile kuonwii dietika ni di suoto, bute ni tinini. **23** Nkpo oso dikpe ni bieyila kekleke di ofū onu lee kame, bitanta nnεε lafee ye di osuku onyu wɔ bikpe ni di obe wɔ bianu ni ɔlaa biene nwu nkpo. ɔlaa biene nwu lεkya buoyie muta kayi batii bamuu ne. Nkpo oso di ami Paulo lebakple Yaa kpεmblate ne.

*Paulo Labla ɔkpe Aata Bafūbanute Dikudi
Nwu Nkpo Fe Kpεmblate Lεma Ale.*

24 Nunua yi, suoto kɔyɔɔ mi ale diobuo mi ta aye oso. Dibuo le kɔnya ni di suoto nii sina kame

ninle ale kayente dibuo le di Kristo ale kanya ni di suoto nii sina kame di bafubanute dikudi nwu suoto. ²⁵ Yaa nieblee ale kale kpemblate nta bafubanute dikudi nwu, ale kayie ɔlaa biene nwu nkpo lεkya, mmle okle baatii katofo ni Yaa ɔlaa nwu nkpo klekle. ²⁶ ɔlaa nwu nkpo ninle owofalaa wɔ di Yaa lεyɔ eekookaa ni saa bakofo batatofo ni nε. Kafɔɔ nunua yi, Yaa ntoodiki nwu kayi eetuo batii ba niefū nwɔ beenu nii. ²⁷ Yaa omu dibiesaa diale ale owofalaa nwu niefū ni kɔyɔ ku lεkpa nɔɔ, oodiki ni kayi aantuo nnle mmuu batii ba niefū nwɔ beenu nii. Owofalaa nwu ninle ale, Kristo nsi wo siitu kame, nle mmle kotuo ale, bukpe kaleko di Yaa lεkpa nwu nkpo kame. ²⁸ Nle mmle oso buobue Kristo ɔlaa nwu nkpo mutua otii biala nε. Ni buɔka ma muntuo ma aasaa di ninumbe nimuu kame, mmle okle buayo ma munse ni di Yaa anu fe batii ba niebla ni onwii ku Kristo batoomuɔ beewo ni nimu. ²⁹ Kafuo ni ɔkpε wɔ mmle ɔbla yi, nkpo oso kokpee okyiini nkpe osie kanya ku osie wɔ omuu di Kristo lεyɔ eekpee mi ni kaame nε.

2

¹ Bitεentɔkɔ ye mmle okle ntɔɔbla ni ɔkpε osie kanya diisi lee ku batii ba ninkpe ni di Laodikea ku batii bule ba bamuu ninayinyεε banya ni diidii. ² Kɔbla nle mmle, ta mmle okle baawε ni otu okpee, mambla ni onwii kafɔɔ di lεbɔmbɔ kame. Diɛkyakaa nii, baawε lesɔnu le niewo ni nimu, ale baatofo Yaa lεwofasaa nwu ninle ni Kristo. Nle mmle ninle lesaawε kplε nε. ³ Kristo kame di Yaa lεyɔ lesaawε kplε le mmle ninle ni ninumbe ku lesaatofo eekookaa. ⁴ Kɔtɔkɔ ye

ɔlaa wɔ mmle, mmle okle di otii kuonwii dilaayo
onya mɛnɛfɛ akyɔnkyɔ ye nii. ⁵ Kunte nnaa ye
diɔkye di suoto sina kame yi, nkpe ye diɔkye
niinwuna kame. Dieyɔɔ mi kafutu, lenya mmle
okle biemufū ofū onu lee bikle ni osie kanya di
Kristo kame.

*Otii Nkpa Ṫwe Niimu Kame Nsi Di Kristo
Kame.*

⁶ Di obe wɔ bitoofū Yesu Kristo fele Saate lee
ni yi, bibla onwii ku nnwɔɔ di nkpa lee disiebi
kame. ⁷ Bise sidu ninnwɔɔ kame osie kanya fe
mmle okle di kowoso nse ni sidu kaaso. Biesie
nkpa di nle nwɔ suoto, nimmle okle biawɛ ni osie
di ofū onu lee kame, fe mmle okle beetuo ye ni.
Diekyakaa ni ninle mmle ɔbla kame yi, bietɔɔpɛ
Yaa sefa obe lele.

⁸ Bilolaa binyu nwaa ale otii kuonwii dieyɔ
kayi ka mmle lesaatofo le ninnaa ni kɔya
akyɔnkyɔ ye. Diekye asaatuo ya mmle lekye saa
bakofo ku anwuna ya nikɔbla ni ɔkpe kaayi ka
mmle nfū. Diele Kristo nfū eekye. ⁹ Diekye Kristo
suoto kame di Yaa letembi nimu nimu nsi. ¹⁰ Di
obe wɔ butɔɔbla ni onwii ku Kristo oso yi, Yaa
ntɔcta wo nkpa mmummu. Diekye Kristo kole
sekà di niinwuna kame basiente ku niwuna kame
kanya bayilate biala suoto.

¹¹ Di obe wɔ bitɔɔbla ni onwii ku Kristo oso yi,
Yaa լeyɔ Ninwuna nɔɔ εετε ye nsū ale bale nwɔ
bile. Kafɔɔ diele fe mmle Yuda batii mbudi ni
asɔkɔsɔkɔ. Kafɔɔ Kristo omu niɛbla nle mmle
εεyɔ eediki wo eekyeko sikpile se butɔɔbla ni
kame. ¹² Di obe wɔ baakpeesa ye ni Yaa ntu
yi, baakookaa ye ku Kristo. Di Yaa ntu okpeesa
nwu nkpo kame, ni di Yaa latakatesa ye ku Kristo

aakyeko kukpi kamε nε. Diekye biefū Yaa wɔ niatakatesa nwɔ aakyeko ni bakpi kamε ku osie nɔɔ bienu.

¹³ Di obe owo nintabafe ni kamε, aye kafɔɔ biakpi niinwuna kamε ta sikpile lee oso, diekye biale batii ba ninanle ni Yuda batii kuufiofa ditawε ye nii. Kafɔɔ Yaa ntɔɔta ye nkpa diefe ni di Kristo suoto, di obe wɔ εεyɔ sikpile loo simuu εεkyε wo nii. ¹⁴ Yaa leyεεsa selaa se simuu nin-yε wo ni di suoto fεε, di kufiofa nwu nkpo ɔtanle kamε. Diekye εεyɔ sī εεpε εεkaasa di kowoso suoto ku Kristo. ¹⁵ Eeklee osie eefū di ninwuna kamε basiente ku ninwuna kamε batunlete bamuu nnεε kamε, eekpee ma sinunɔɔ di lεkpaka, eemufū ma selanle ku suoto leyɔɔ di lelenkee kamε.

¹⁶ Nkpo oso bitanta otii kuonwii lakpee ye kufiofa di lesaa le biale ni ku nle bianyi ni suoto, ee ayi klekle suoto, ee awente fole dii ole suoto, ee Lenyeεetεyi suoto. ¹⁷ Asaa ya mmle amuu nle lesaa le nimawa ni kunyii. Lesaa nwu nkpo nimu nimu ninle Kristo wɔ nintɔɔwa ni nε. ¹⁸ Bitanta otii kuonwii lalo ye lepɔɔ ale biawakosa suoto kasɔ di selaa kuafunu kamε ee biakyɔɔ Yaa batɔkyente atoko. Batii ba mmle nimbuε ale odiki otuo lefī, mantakatesa suoto katoo kasakasa, diekye suoto sina kamε disibu lete ninkpe ma. ¹⁹ Diekye baasinsi di Kristo wɔ ninle ni disi εεta ni suoto sina nwu nkpo simuu kamε. Kristo nfū di suoto sina aba nwu nkpo simuu nwε suoto osie ankya baawo, simmuɔ fe mmle okle di Yaa komie nii.

Nkpa Fole Osie Di Kristo Kamε.

²⁰ Di obe wɔ butookpi ni ku Kristo oso yi, butoodie di kayi ka mmle anwuna kpile osie nnɛɛ kame. Ni be lesaa oso biekple biɛta boonii afiofa wɛkye wɛkye nwu nkpo manta ye fɛ kayi ka mmle osie kalɔ biekple bisi? ²¹ Be lesaa oso bookple mantɔkɔ ye ale bitamblako nle mmle ɔkpɛ, ee bitantu nle mmle bianyu, ee bitankpanko nninkpo kafɔɔ? ²² Afiofa ya mmle amuu nle asaa ya mamblako ni ɔkpɛ anloo ni di obe ninya nfe ni ale. Batii ɔsaabla ku asaatuwo awo ko ale. ²³ Di Yaa ɔkpɛ ɔbla di suoto sina lekye yi, nse otii lemufu afiofa ya mmle nwu eeklee εewakosa suoto kasɔ εεbla suoto amumu yi, ninte fele ninumbe kple dile oodiki antuo. Kafɔɔ asaa ya mmle nwu nkpo ɔbla nínkyakaako otii nwu nkpo. Ánfuo nwɔ ɔkyakaako aalenkee suoto sina akɔnsɔkleesaa nɔɔ.

3

¹ Di obe wɔ di Yaa ntɔɔtakatesa ye eekyeiko ni bakpi kame ku Kristo oso, bita anu lee atika di Yaa kafa asaa suoto, nfū di Kristo nsi ni di Yaa oletanɛɛkye. ² Bita asibu lee atika di Yaa kafa asaa suoto, diele n-ya kaasɔ ka mmle suoto. ³ Diekye bitookpi ni yi, nkpa lee ntoowofa di Kristo kame di Yaa kame. ⁴ Nkpa lee mmummu ninle Kristo ne. Nkpo oso nse Kristo nwu nkpo lekyɔɔ yi, ni ayee bibakyɔɔ ku nnwɔɔ lɛɛkpa nɔɔ nwu kame.

Bitookple Batii Fɔle.

⁵ Nkpo oso, dikpe ni bielo suoto sina akɔnsɔkleesa ya nikɔbla ni ɔkpɛ di suoto lee kame, ninle ni, lesɔnɔkppee, asaa kρɔnɔnfɔɔ ɔbla,

ku ɔkɔnsɔ akleesaa kpile, ku suoto sina kamε abiesaa kpile, ku onumbεbeε wɔ ninkaate ni ku afiɔ ɔtɔ. ⁶ Ta asaa ya mmle ɔbla oso di Yaa ɔbla kamawa di batii ba ninkpe ni setokopɔ suoto ne. ⁷ Ninkpa be bitoosie biebafe nii, aye kafɔɔ biabla asaa nwu nkpo okle.

⁸ Kafɔɔ nunua, dikpe nii nfε mindie asaa nwu nkpo ɔbla. Dile ni sεblɔ ɔnya, kafutu kamε ɔtɔ okpee, kakyidi, ditiikpononfɔsa ku mbusuo sεlāa obue. Disinnaa ale asaa ya mmle nkple antɔɔbla ɔkpε kaame lee. ⁹ Di obe wɔ bitoodiki letembi kofole nwu bietε ni di ɔlɔɔkɔ, bitansinlaa biatɔɔta bawo. ¹⁰ Bítɔɔyɔ letembi fɔle nwu nkpo biekpee nii, Yaa kɔbla letembi le mmle lεfɔle obe lele di nnwɔɔ omu nɔɔ letembi kanya ale biatofɔ nwɔ.

¹¹ Ta nle mmle oso kase kukanwii diesinsi di batii ba ninanle ni Yuda batii ku mba ninle ni Yuda batii ntεε. Nkpo okle kafɔɔ di kase diesi di mba niebudi ni asɔkɔsɔkɔ ku mba ninambudi nii, ku mba nimbuε ni sele ate ate ku nkpayotū batii, balanle ku mba ninanle ni balanle ntεε ne. Bamuu lema batii banwii bale di Kristo kamε, nnwɔɔ kafɔɔ ninsi bamuu lema kamε ne.

¹² Obe wɔ di Yaa mbɔmbɔ ye eediki ye εεbla ni bale nwɔ oso, bita letembi nɔɔ disie ye kaame. Biɛnya batii nyaami, biɛbla sifutule, biɛwakosa suoto kasɔ, biɛbla buεε, biɛwe situ kafɔɔ. ¹³ Bikyakaako bawo, nse onwii lee lebla owo okpile yi, aayɔ akyε nwɔ fε mmle di Saate nwu layɔ aakyε ye ni. ¹⁴ Di asaa ya mmle nwu nkpo amuu ɔbla kamε, bibɔmbɔ bawo. Diekye lebɔmbɔ niemufū asaa amuu eenii εεbla nya ninwii niimu kamε.

15 Bita atoko ɔkye ole wɔ di Kristo leta ni dile sekə di situ lee kame. Diekye, nkpo oso di Yaa leles ye eesiisa εεbla ye suoto sina sinwii ale biawɛ atoko ɔkye ole ne. Nioso obe lele bitɔɔpɛ nwɔ sefa. **16** Bieta Kristo ɔlaa biene nwu nkpo kuyii ye situ kame pɔ. Bietootuo bawo asaa, biɛtɔɔka bawo di ninumbe kame. Bieyɔ Kokpana Klekle kame sinu ku bafūbanute sinu ku sinu se niekye ni Ninwuna Klekle kame bitɔɔpɛ Yaa sefa di situ lee kame. **17** Lesaa lele bibabue ee mimbla, biɛbla ni di Saate Yesu leyooto kame, di obe wɔ biofe di suoto nɔɔ mimpɛ ni Teete Yaa sefa.

*Bisiε Di Nkpa Fɔle Nwu Kame Fe Kristo
Bafūbanute.*

18 Basante biwakosa suoto kasɔ bita basa lee, diekye nkpo okle dikpe ni biɛbla fɛle Kristo bafūbanute ne.

19 Aye basuɔtɔ kafɔɔ bibɔmbɔ basɔfɔ lee. Bitantɔɔkpakpalɔ ma.

20 Babisɔ, bikyɔɔ balofotɛ lee atoko obe lele. Diekye nle mmle ɔbla mbuo Yaa anu osie kanya.

21 Babibate, bitankpee babi lee sɛbłɔ, ale nnɛɛ dilaafee ma.

22 Balanle, bikyɔɔ basaate lee atoko kaasɔ ka mmle suoto di asaa amuu kame. Bitanta diale ale obe wɔ baye di ɔlɔɔkɔ lee boonyu ye ni fie biabla ɔkpe bile biobuo ma anu. Kafɔɔ bibla sɛkpe ku situ biene bita ma, ta dibu le bikpe bieta ni Saate nwu oso. **23** ɔkpe lele biɔbla yi, bibla nwu ku otu biene fɛle Saate nwu biɔbla minta, kafɔɔ bitanta diate ye fe otii biɔbla minta. **24** Binyuma bile bibafū letota lee minkyeko Saate nwu nfū, nle eebue εεte ale abata ni batii nɔɔ. Kristo ninle

Saate wɔ ɔkpɛ biɔbla nii. ²⁵ Binyuma bile otii lele niebla okpile, abafū letokonanfi nɔɔ di okpile wɔ εεbla ni kanya. Diekye Yaa nínnyu otii di anu fie annanfi nwɔ kootoko.

4

¹ Aye ɔkpɛ basaate, obe wɔ biye bile ayee Saate nkpe ye ni di osi oso yi, binyu bile biɛbla lɛsaa le ninle ni di osuku kanya biɛta balanle lee.

Asaa Ya Dikpe Ni Bafūbanute Letɔɔbla Nii.

² Bipe ɔlaa bitɔɔta Yaa obe lele. Nse biɔpɛ ɔlaa minta, biɛta anu lee ate kesekese, biɛtɔɔpɛ nwɔ sɛfa. ³ Obe lele biɔpɛ ɔlaa minta Yaa yi, bieyuma wo kafɔɔ ale Yaa kasekete osuku anta wo ale buadiki Kristo owofalaa biene nwu di Yaa lakookaa ni saa mumbue. Nnwu oso nte leeyo nɛ. ⁴ Bipe ɔlaa bita bile kafuo owofalaa biene nwu odiki obue, batii nnu nwu kasɔ klekle fe mmle okle dikaate nii.

⁵ Bitofo mmle okle biakyɛ ni ku batii ba ninanle ni bafūbanute niinumbe kame. Osuku biala biewɛ, bieblako nwu ɔkpɛ bita Saate nwu. ⁶ Bita lekakate lee dile onu kootoko obe lele, bietofo mmle okle dikaate ale biadiki ni batii kanya di selaa suoto.

Lɛsɛɛsa Yentele.

⁷ Obiloo bɔmbɔtɛ Tihiko wɔ ninle ni kpɛmblatɛ wo nii di Saate ɔkpɛ nwu kame, ɔɔbla ni ɔkpɛ ku otu biene kamatɔkɔ ye ɔlaa nii. ⁸ Nkpo oso kokpee nwɔ ɔkyɛ lee nlɛ, abatɔkɔ ye mmle okle ninfū nte nii, an-yɔ ankpee ye osie. ⁹ Manko obiloo Onesimo wɔ mumbɔmbɔ ni osie kanya buofū nwɔ buonu nii, eekye ni kamɛ lee nikɔwa.

Babawa mamatəkə ye lesaa le nikəbla wo ni ninfū.

¹⁰ Aristarko wō ninte ni leeyo ku ami ku Marko wō ninle ni Barnaba obilema ale bɔɔsəesa ye. Batətəkə ye lesaa le dikpe ni biebla bieta ni Marko kofokofoko. Nkpo oso nse εεwa biefukuti nnɛɛ lee bifū nwɔ̄ ku suoto lεyɔ̄. ¹¹ Yosua wō bɔɔlesɛ ni Yusto kafɔ̄ ale ɔɔsəesa ye. Batii baties ba mmle ninle Yuda batii ba niefū beenu bɔɔblakoe ni ɔkpɛ di Yaa sɛka kalekɔ̄ nwɔ̄ nkpo suoto nɛ. Bale lεkyakaako kple kafɔ̄ beetee osie kanya.

¹² Epafra wō ninle ni Kristo kpɛmblate wō niekye ni bafūbanute kasiisakɔ̄ lee nwɔ̄ kame kafɔ̄ ale ɔɔsəesa ye biene biene. Obe lele ɔɔpɛ ɔlaa anta Yaa diisi lee osie kanya ale, aata ye minyila kekeleke ale biamuɔ̄ minwo nimu di ofū onu lee kame, minkyɔ̄ nwɔ̄ ɔlaa kotoko diibiesaa nɔ̄c suoto. ¹³ N-ye nwɔ̄ kamaa kobue nle ɔɔbla ɔkpɛ osie kanya anta ye ku batii ba ninkpe ni di Laodikea ku mba di Hierapoli. ¹⁴ Obiloo bɔɔmbɔ̄te Luka wō ninle ni fablate ku Dema kafɔ̄ kɔɔsəesa ye biene biene. ¹⁵ Buɔɔsəesa babiloo ba ninkpe ni di Laodikea ku obiloo sankobi ninfa ku bafūbanute ba ninkyaka ni leeyo nɔ̄c.

¹⁶ Nse bitooloo kukū ko mmle ɔka yi, bieyɔ̄ kū bikyesee bafūbanute ba ninkpe ni di Laodikea kafɔ̄ baaka. Bieka nko kafɔ̄ lakpana lakyesee ni Laodikea bafūbanute kafɔ̄.

¹⁷ Biɛtəkɔ̄ Arkipo bile akpee kɔnyaabε aayɛntε Saate ɔkpɛ wō εεyɔ̄ eekpee nwɔ̄ ni ninnɛɛ kame ninfa.

18 Lεsεesa le mmle yi, ami Paulo omu niεyɔ kɔnɛɛ nii lεkpana. Bitanyee mi kafɔɔ di obe wɔ nte ni leeyo. Yaa sibualɛ disiɛko ye.

Yaa Kanya Ninii Fole Selεε

Selεε: Yaa Kanya Ninii Fole Selεε New Testament

copyright © 2008 Wycliffe Bible Translators, Inc.

Language: (Selεε)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source files dated 29 Jan 2022

b86b27c9-33ee-5380-a452-244df2dc60c6